

# Mi Kasá Promé

Diariamente nos tin kontakto ku otro hende. Esei kier men ku diariamente nos tin ku someté na un òf vários pèrsona. Yunan tin ku obedesé na nan mayornan. Alumnonan ta someté na nan dosente. Parokianonan ta hasi loke nan pastor ta bisa. E empleado ta aseptá instrukshon di doño di su trabou. Un deportista ta adapté na su entrenadó. Suidadanonan ta obedesé nan gobernantenan, i esnan ku ta representá nan: òntvanger, polis, èts. Pashènt ta sigui e preskripshon di dòkter. Shofùr ta tene kuenta ku e mucha ku ta para trafiko despues di skol.

E unifòrm den kada kaso por ta diferente. Ma ta un echu ku bida largu nos tin ku tene kuenta ku outoridat. Nos ta hasié, sea ta konsiente òf inkonsiente. Nos ta pone nos mes den rango bou di esnan ku ta riba nos.

Ta interesante pa nota ku e outoridat por fluktuá un ora pa otro. Kisas un momentu bo tin ku someté na un pèrsona i un ratu despues e tin ku someté na bo. Por ehèmpel, bo ta sigui òrdu di polis. Ma si e polis ei ta hunga futbòl i bo ta su entrenadó, e tin ku hasi loke bo ta bisa riba fèlt.

Nos ta komprendé i aseptá esaki komo algu normal di bida. Ma ora ta regardá matrimonio, algun hende no ke komprendé pa nada.

Beibel ta bisa bon kla ku e esposa mester someté na su esposo (Efesionan 5:22). Esaki ta Dios Su instrukshon pa por tin òrdu den e famia. Ma inmediatamente promé ku esei, Dios ta bisa "Kada un obedesé (someté na) otro den temor di Dios" (5:21). E teksto aki ta mustra ku den matrimonio e sometementu mester ta *mutual!*

Hopi hende hòmber tin un mentalidat machista: "AMI ta kabes di kas. Mi esposa tin ku hasi loke MI ta bisa. E tin ku baha kabes pa MI pensamentu. AMI ta manda. E tin ku someté na MI." Ma no por haña e mentalidat machista ei den Beibel! Al kontrario, segun Skritura, *tin tempunan ku e esposo mester someté su esposa tambe!*

Beibel ta duna un ehèmpel kla di esaki ora e ta trata ku relashon seksual. "E esposo lo kumpli ku su deber di matrimonio ku su esposa, i igualmente e esposa ku su esposo. E esposa no ta manda riba su mes kurpa, ma e esposo; i méskos e esposo tampoko no ta manda riba su mes kurpa sino e esposa. No apstené boso di otro, sino ku konsintimentu di otro pa un poko tempu..." (1 Korintionan 7:3-5). Klaramente un no por haña su gana tur biaha i laga e otro frustrá. Kada un mester hasi maksimo esfuerso pa komplasé su kasá! Kada un mester someté na e otro!

Den kada matrimonio, tin diferensia di opinion. Tin ora esposo tin rason i e esposa ta kiboká. Den e kaso ei, e mihó kos pa e esposa hasi ta someté. Ma tin ora, ta e esposa ku tin rason. Kisas e hòmber no a kalkulá bon, a hasi un eror. Kiku e esposo mester hasi den un kaso asina? Ta klaro ku e mester someté na e pensamentu di su esposa! Algun hende hòmber ta muchu orguyoso pa atmití ku nan a kiboká. Nan ta nenga rekonosé nan eror. Nan mester gana! Nan mester saka kara tòg, i p'esei, tin ora, nan ta pèrsistí ku nan pensamentu kiboká, sabiendo ku e muhé tin rason.

Ningun hende ta pèrfekto. Si e esposo mester gana tur biaha, e por—i lo—hasi desishonnan robes. Si e ta nenga konseho di otronan, inkluiendo konseho di su esposa, e ta buska problema pa su mes. "Esun ku wòrdu repredí hopi biaha i ta tene su nèk steif, lo wòrdu kibrá diripiente, sin remedi" (Proverbionan 29:1).

Tras di e portanan será di hopi kas na nos isla, un guera formal ta tumando lugá. E ta un guera pa mira ken lo ta promé, ken lo ta na kabes, ken lo manda. E konflikto aki ta produsí kurasonnan kibrá, emoshonnan heridá, i tur klas di problema den famia i matrimonio. Ma ki un dushi ambiente lo reina den un kas unda tin un otro kompetensia; ora tantu esposa komo esposo ta bringa pa sirbi su kasá mas mihó, ta batayá pa komplasé su kasá mas, ta kompetí pa mira ken por ta último na lugá di promé, ta buska maneranan ku e por someté na su kasá!

Irealistiko? Nò! Esei ta simplemente loke Dios ta eksigí! "Esun ku ke ta di promé, esei lo ta último di tur i sirbidó di tur" (Marko 9:35).